

Reglamaint d'absenzas e da jokers

Art. 1 Princip

La scoula ha da gnir frequentada regularmaing e punctualmaing. Ella nu po gnir mancantada sainza motivaziun urgainta.

Art. 2 Cumpetenzas da congedi

Tenor l'artichel 28 da la ledscha chantunala da scoula po il portader da scoula (cussagl da scoula) decider davart congedis fin ad üna fin ad ün total da 15 dis per on da scoula. In quists 15 dis sun eir cuntgnüts trais mezs dis da joker chi pon gnir determinats dals genituors. Las cumpetenzas in dumondas da congedi sun definidas tenor la tabella seguainta:

cumpetenzas		total dis per on da scoula	cura inoltrar las dumondas
genituors	fin 3 mezs dis (joker)	1 ½ dis	3 dis da lavur avant (formular da joker)
magister da classa	da 1 ½ fin 3 ½ dis	3 ½ dis	1 eivna avant (dumonda in scrit)
manader da scoula	da 3 ½ fin 8 ½ dis	8 ½ dis	2 eivnas avant (dumonda in scrit)
cussagl da scoula	da 8 ½ fin 15 dis	15 dis	2 eivnas avant (dumonda in scrit)
uffizi chantunal da scoula	sur 15 dis		dumonda scritta a l'inspectorat da scoula 20 dis avant

Art. 3 Dis da joker

Ils dis da joker dessan gnir retrats be per occasiuns specialas, perche minch'absenza disturba l'andamaint da scoula – pel scolar, pels conscolars sco eir pels magisters o las muossadras.

Il formular da joker sto gnir inoltrà almain 3 dis da lavur avant al magister da classa o a la muossadra da scoulina cun motivaziun da l'absenza. Vain la dumonda cun retard, ston ils genituors motivar quai in scrit al magister da classa o a la muossadra da scoulina.

Ils genituors güdan ad evitar cha'ls scolars piglian dis da joker be per tils "dovrar sü". Dis da joker nu pon gnir surportats sün ün nouv on da scoula.

Als seguaints dis nu pon ils scolars retrar dis da joker: Prüm di da l'on da scoula, occurenzas specialas da scoula (Nadal, Chalandamarz, dis da sport, viadis da scoula).

Art. 4 Congedis fin 15 dis

Dumondas da congedi fin 15 dis ston gnir inoltradas in scrit il plü bod pussibel o il plü tard 2 eivnas avant al magister da classa o a la muossadra da scoulina per mans dal mainascoula.

Il scolar infuorma a bocca a tuot ils magisters da rom davart si'absenza, sajan quai absenzas da joker o da congedi.

Art. 5 OTRAS absenzas

Ils genituors ston annunzchar al magister da classa il plü svelto pussibel absenzas da scolaras o scolars our dals seguaints motivs:

- in cas da malatia e visitas pro'l docter o pro'l daintist
- curas o terapias chi ston gnir fattas d'urant il temp da scoula our da motivs da sandà
- cas da malatias / d'accidaints greivs o da mortoris in famiglia

Absenzas da scolaras o scolars pels seguaints motivs vegnan trattadas tenor la tabella i'l artichel 2 da quist reglamaint:

- occurenzas religiosas importantas
- partecipaziun activa ad occurenzas da sport, da scienza e d'art
- ingaschamaints in plaiv d'onur
- sogiuorn a l'ester o in ün oter territori linguistic
- visitas pro posts da cussagliaziun o d'autoritats

Art. 6 Dispensas

Decisiuns a regard dispensas regularas o per singuls roms sun illa cumpetenzza da l'uffizi chantunal da scoula e da sport.

Art. 7 Giansunadi d'insai

Congedis per giansunadis d'insai nu sun suottamiss a quist reglamaint. Il permiss in tal cas vain dat dal manader da scoula in consonanza cul magister da classa. Las formalitats sun regladas i'l formular "Il giansunadi d'insai". Tal formular as rechatta sülla pagina d'internet da la scoula.

Art. 8 Tour davo la materia mancantada

Materia da scoula, lezchas e lavurs ston gnir tuttas davo in aigna responsabilità e redschia o cun agüd dals genituors.

Manca ün scolar da la scoula sainza s-chüsa valabla (per telefon o in scrit), pon gnir strichats dis da joker.

Art. 9 Maladöver

Tenor l'art. 96 da la ledscha da scoula chantunala pon genituors chi nun observan lur dovairs tenor l'art. 68 gnir chastiats cun üna multa fin fr. 5'000.-. La magistraglia es obliada d'annunzchar al mainascoula absenzas na permissas.

Art. 10 Disposiziuns finalas

Relaschè dal cussagl da scoula als 18 november 2014, as basond sülla ledscha da scoula chantunala dal Chantun Grischun dals 21 marz 2012 e sün l'ordinaziun da scoula dals 25 settember 2012. Quist reglamaint es in vigur a partir da l'on da scoula 2014/15.